

鉅水齋詩集

重刻餅水齋集序

邇之有言士有曠百世而相感誠不自知其何心苟非世之所稀胡爲使予歛歟而不可禁乃有文章之應求同於風義之感激者宗嘯吾司馬生有軼才雅好詩歌亦旣不懈而入於古矣流連作者之林讀餅水齋詩而篤好之鐵雲先生天才亮特超乎塵濫之外冠劍遠游與奇氣相發詩篇雄峻畦町獨闢同時朋輩旣無與抗手卽求之高岑歐梅且變化匪由於擬議也風徽未沫詩卷流傳之本漸稀陽湖黃仲則秀水王仲瞿豐才嗇遇畧等先生顧數十年中遺集皆四五刻紙貴藝林餅水齋集則不絕如綫嘯吾銳意覆刻行世然而薄宦羈栖鉛槧不易就同志諸君謀之經歲工未及半嘯吾遽捐館舍玄文在篋以待侯芭而餅水一刻又君未竟之緒

邊竹潭巖尹再謀之同志乃得告成時宗君之逝已將一年
昔袁中郎得徐文長遺艸於故紙中賞奇感歎作敘有數至
之言今舒氏遺集得獻梧而益廣其傳吾尤望世有袁中郎
其人以傳文長者傳獻梧也然而幽奇磊落之士生而連蹇
不得已以空文自見鐵雲之落魄戎幕畧似文長獻梧之浮
沈下位差類仲則則夫數寸之遺書傳與不傳要之不必爲
醬瓿之覆亦僅同駿骨之求而已可勝慨哉仁和譚獻仲儀
敘

原序

沈李昌谷於溷神之中寄劉公幹於鬼伯之口微之未死託
遺稿於香山荀攸臨終交阿鶩於鍾會良士自大梁來揚而
吾姨丈人之集成於眞州昔宋考功毒希夷而有其佳句齊
邱子沈譚峭而有其化書若巴樸圍觀察之敦命劂工與刊
傳作何遜卒而王僧孺集其文崔湜死而裴耀卿纂其集爲
千古尙也我姨丈人位才備八厨身行萬里於粵則愛鐵雲
之山於黔則樂飛雲之洞故其詩千巖競秀萬怪惶惑趙雲
菰八十而願以詩師梁山舟九十而見其書拜其實錄也王
筠見沈約不謂遲暮逢君劉頌見張華豈信人間有此蓋讀
書數倍於前輩宜積薪居上於後來嘉慶二年偕我備兵叔
馳驛軍營值齊王氏火燒朱鎮而西時也師漏多魚翁驚失

馬入黔貴則南籠方圍馳楚壁而襄樊正急間道則經煙塵

六十四路而遙遇敵則會相州九節度師而戰湖督

汪文信公新

假我叔氏勝軍三千以田悅之親家分猗廬之餘卒與先生

一鞭一筆九拒九攻纔及貴境而雲南土練籐甲諸軍悉隸

麾下婦人作賊馬援之所能平女子從軍李廣之所不將而

時所部女官土司龍囊仙者馬上桃花木蘭火伴寵以妹喜

之勇冠假之敖曹之鼓蓋壁其軍於水倒流山也斬龍仙則

惟擁二矛禽史歸而僅馳七騎從先生之計又更舊將以易

夷兵變徽章而改番服不旬月間而女賊王囊仙致於麾下

興義之戰以李典步騎八百破吐蕃甯州三萬力追銀鼓生

禽鬼章論功者謂督部灰囊火馬之功實本道輸功墨守之

奇也南籠圍解我叔氏以前官左降復介君於湖楚軍營者

五載急攻則殪下濃書緩戰而圍城作賦杜暹州紙豈止百
番謝公庫賤殆將九萬房元齡軍書之奏駐馬皆成令狐楚
白刃之中揮毫不輟大府初以君奏畱黔中而介推逃賞魯
連辭功賦櫻桃爲林甫微辭軍中作冰山曲詠蜀道與嚴公寓意要
其賦性蕭閒秉心引退示不願爲桓沖參軍故託意作郝隆
蠻語也叔氏嘗語予曰吾貴州之行洩斬叛苗一百餘萬雖
韓愈行軍不逢裴度而令狐辟幕實得劉蕡蓋謂先生鄒枚
之亞也八年癸亥與良士結鄰吳中何蕭雨雋之巷張陸交
讓之濱旣無貞白層樓誰與戴公築室重陽風雨日日催租
淞水蘼蘼年年負米長洲宋汝和觀察爲同人刻今雨集也
屬良士刪鄭集之鷓鴣屏謝詩之蝴蝶選取雄章多將百首
其盛氣如孔文舉其博議如劉子駿其貫串如酈道元水經

注其磊落如司馬大人游獵賦緊是時也趙嘏第論其詩細
蔡邕已傳於京師愛君者焚宮中媚香不識君者亦薔薇浣
讀香山誦一首而女子價高康樂出一篇而洛陽紙貴無以
逾矣古之工爲詩者或一卷擢第或一聯入相或一詩得黃
門一詩得郎侍如先生者李泌蓬萊之閣王珪金炬之蓮國
之光也而乃楊徽警句未登御屏公權法書不題殿壁生無
花樹之居死乏西華之里嗚呼命歟性樂楷隸工李主錯刀
法永公門限穿羽陽宮瓦寫老嫗扇頭其與人書也絳盆糊
麪豈惟百函青泥封書每馳萬里弄陳遵尺牘爲榮得劉宏
手書爲悅若良士之不嗜裝潢者亦復衣藏素靖之書帶祕
鍾繇之札孔文舉謂舉篇見字欣然獨笑蔡中郎謂筆跡當
面相見無期能無慟哉精音律工三絃亦習弄笙篳彈琵琶

則鸛鶴立聽奏羯鼓而羣羊躑躅十四年己巳與太倉畢子筠華珍流寓京國作伶元通德吳剛修月數十齣微服聽酒樓之歌重賂購樂人之價若王昌齡之旗亭次第李協律之流布管絃王門伶人爭爲搬演也素不賃車馬輿轎公卿名大夫或時訪其門館怡然不報單衣練布惟能晝眠散髮斜簪不標丰度竊以爲南州高士但見林宗江東步兵不推張翰先生之致負乎高也淵岱之寶不盡延州之德不孤錢塘陳雲白洎令子孟楷太倉蕭子山學相次第才各縱橫先卒之日紀其喪事賻之歛之傳之序之而先生之哀毀滅性死孝傳矣夫詩小藝也好香山而死者爲唐衢膏少陵而飲者如張籍李洞鑄佛孫晟畫仙諒有人焉李益征人之作天下皆傳嵇康四言之詩愷之如畫君何不年而使後君死者沈

子明刻李賀遺詩王士源爲浩然集序也時嘉慶二十一年
秀水姚弼仲瞿王良士頓首拜書

超越變化乘空凌行吾於太白東坡兩家神往焉蓋其得於
天者厚而資於學者尤深也鐵雲孝廉與余家爲三世舊交
深知其賢於世者當不獨以詩稱而胸次博大志行雅潔於
其詩略見之頃者鐵雲過吳門見訪得讀其行篋所攜詩二
卷皆黔南戎幕往還時作助之以江山習之以軍旅則又如
少陵入蜀後詩之一變司空氏之品曰反虛入渾積健爲雄
又曰黃唐在獨落落元宗鐵雲蓋駸駸乎其日上矣歲在癸
亥閏月長洲宋思仁靄若書於紅杏軒中

開徑如鑿山破下語如鑄鐵成無一意不奇無一句不妥無
一字無來歷是真能於長吉玉谿八叉之外別成一家遂獨

有千古宋元以來所未見也豈惟畏友兼藉師資歎服何旣

陽湖趙雲松

以字

識時年八十

先生與先君子同名故每與
位筆札往還所署皆如此謹

攬所投示詩卷不及二百首而眾體咸備縱橫莫當爲擊節者累日諸體之中七古尤勝若張公石斷牆老樹圖破被篇等作前無古人後無來者非浸淫於三李二杜者不能又如團扇夫人曲等篇不啻鄭公嫵媚廣平鐵石矣窺豹一斑得麟獨角欣賞當何如也梧門法式善讀竟并題

他人之詩有六義鐵雲之詩兼有三長他人之詩有四聲鐵雲之詩兼有五音他人之詩有唐宋元明鐵雲之詩則兼有離騷八代也乙卯以前足名家矣丙辰以後其大家乎同縣龍鐸震升氏題於湘藩官舍之古雪山房

鐵雲孝廉足下僕聞韓娥之謳不夔曠而賞纖麗之足不良樂而貴豈不以作之難而知之易耶然而魚目混珍什襲過

於照乘幽蘭斂馨棄置等於白葦知己之歎有由來矣足下
勤勤媚學囂囂好遊猥以識途得窺隱霧縱橫文雅騫翔藻
思使僕搖目黃絹戢心白雪反覆嗟歎得未曾有昔者廬山
之詩勒諸齋閣隴首之句書於便而僕雖非其人實有同嗜
乃蒙損書獎飾過當僕少慙學殖早從簿書猶幸監司事疎
未拋故業海濱地僻不乏嘉賓選勝攜壺尋芳減從亦竊冀
識伏鸞於海上懷好音於空谷焉足下味經史之腴得江山
之助博議之著旣成於早歲八覽已就合懸之國市何不約
其簡札付之棗梨此誠嘉惠之盛懷無損勞謙之深詣芳草
未歇緒風漸暢跌宕文史保衛眠食臨書馳企不盡所陳陽
湖陸孝廉繼輅讀足下所贈俞五琵琶詩詫爲絕調傾想備
至行復以樂府諸作示之矣廷敬再拜

右滄州李味
莊先生手書

庚午七月鐵雲孝廉枉顧以長卷索書鄙作僕本不能詩又奉讀大集及見贈之什驚才絕艷令人舌撝不下泥敢持布鼓過雷門耶顧辱虛下殷懷深懼有孤雅教錄集杜句若干首聊塞諾責自媿東搏西撝得罪古人或者以兒童顛倒天吳見原大雅一笑置之幸甚錢唐梁同書識

時年八十有八

自昔少陵篇什以蜀道爲工玉局文章以海外爲最若乃隱几危坐談鄒衍之九州歆腳高眠遊少文之五岳則縮地無術坐井何觀又或韜沂歷遠稱妮探奇讀秦碑而失韻探漢策而忘年謬解廣陵之曲江誤賦黃州之赤嶼亦復識慙測蠡才窘練都將何以吐納風雲牢籠圖史闢蠶叢於紙上走巨靈於豪端若鐵雲孝廉餅水齋詩則庶乎群雅盡拚兩弊俱亡矣鐵雲舊家薊北作客江南皋橋有伯鸞賃居當湖爲

公房壻水而南史寓公多書故土西京科舉必自本州快心
黃絹之辭失意紅綾之餅策蹇長安道上未是家鄉落帆短
簿祠前反成故里所由以幽并之慷慨兼吳越之飲吟者也
溯其少侍嚴君久隨遠宦雲橫畫舫洞庭秋水之波香染征
衫庾嶺梅花之瘴樹攀入桂路繞三湘旣而一舸還吳單車
適楚灞陵感舊漢上題襟枕柳和木客之吟茉莉紀夫人之
謚每登高而懷古獨擊汰以長謠況復一上天梯再經雲洞
題壁奢香驛畔傳餐關索嶺前時則九姓鴟張三苗豕突雄
師雲合上將星高洗銅柱於辰谿肅銀刀之甲帳君乃墨磨
龍盾紙寫羊皮斫地作歌據鞍起草印孃屬鞬激昂龍女之
篇藤甲橫戈愴惻花卿之作紅江綠海雨雪懷人猥妾猗仙
烟花覽俗續蠻府姬隅之唱補漢家饒吹之歌或以壓綫生

涯疑妨瀏覽轉蓬蹤迹恐廢蒐羅不知劉穆百函乃其餘事
王充十篋多載奇書冥心默識馬上枕上之功燂掌遠稽歲
餘日餘之候手鈔八千餘紙口誦四十萬言王劭思書臨餐
閉目楊憑好古對客搖頭其壯遊也如彼其博覽也若此宜
其擊鉢頻催攜囊滿貯碧城錦瑟義山最善製題蒼耳白頭
飛卿尤工屬對張融集名玉海孫綽句作金聲抗顏古人高
步吾黨作者之推良非妄已且夫一得儀同馬生遂勝孔子
未成進士梁使不識羅君知鐵雲者惜其命與才妨名由遇
減余則謂失馬何嘗非福探驪要在得珠假使雁塢早題鵠
行遽列入參玉筍出綰銀黃蹟拘臺閣之間力盡簿書之內
轉恐渭城罷唱燕寢廢吟今則項項蕭晨悠悠遠道烟雲發
其藻采卷軸助其波瀾乘有暇之時作必傳之業安見晚達

之馬周不勝早貴之何晏哉余與鐵雲昔歲測交在仲瞿孝廉之坐今茲話舊過雲伯大令之居仲瞿石鼎句奇冰車詞壯出入三乘縱橫百城雲伯濤湧碧海霞卷絳霄上薄風騷下掩盧賂而鐵雲樹精嚴之筆陣逞詭譎之詞鋒各有千秋能無三舍乃辱惠施知我之深每有敬禮定文之託因陳梗概書諸簡端擷其英華此才何減八斗語其聲價一篇可直百金以質執林庶不河漢婁東蕭掄子山序

舒鐵雲傳

舊史氏石韞玉撰

舒位字立人大興人祖大成翰林檢討父翼廣西永福縣丞
初永福君之兄希忠官江南永福君偕行寄居吳門而生位
誕彌之夕母沈孺人夢一僧手執桂枝自言自我嵎山來既
寤而位生因小字曰犀禪少穎悟讀書十行俱下十歲能文
希忠撫之曰此吾家千里駒也年十四隨父任永福官舍後
有鐵雲山因自號鐵雲山人會安南使人入貢永福君奉大
府檄出關館伴挈位同行位賦銅柱詩使者攜歸安南由是
其國中貴人皆知位爲中國才子既而入都應京兆試不雋
則盡發祖父遺書數萬卷讀之乾隆戊申領鄉薦是時永福
君以事失官貧不能歸故鄉歿於江西弋陽位迎其喪至吳
門欲家焉而無屋則之湖州假館於烏鎮沈氏寄其孥而身

乃往依河間太守王朝梧爲幕中上客既又從威勸公勒保
征黔西狃苗磨盾鼻草軍符晝夜勞瘁公深器之狃苗平威
勸公移師入蜀勦捕白蓮教妖人將攜位以行辭曰家有老
母倚閭望予久矣今卽以萬鍾之祿易一日也養非所願也
況此區區武功簪哉遂歸當時士大夫開府東南者皆願羅
而致之幕下羔雁成羣舒生名藉藉公卿間嘉慶乙亥十月
遭毋喪哀毀過乎禮病遂不起維時已移家吳門子某某遂
占籍吳縣位所著瓶水齋詩十八卷揚州巴氏授梓以行世
尙有 若干卷藏於家

舒鐵雲傳

錢唐陳文述撰

君姓舒氏諱位字立人又字鐵雲直隸大興人曾祖勳邑庠生祖大成康熙壬辰科進士翰林院檢討父翼廣西河池州知州以君伯希忠官江南寄孥於吳遂家焉誕之夕母沈夢一僧手折桂花從峨嵋來故小字犀禪十歲下筆成章年十四隨父官粵之永福讀書署後鐵雲山因以自號安南入貢隨父山鎮南關逕使者賦銅柱詩相贈答年弱冠登賢書值河池君喪僑寓湖州之烏鎮者十年既從王朝梧觀察之黔值南籠狎苗不靖威勤侯勒保統兵征之觀察身在行間君爲治文書勒侯見而器之恒與計軍事狎苗平勒侯移督四川爲經畧統三省兵攻白蓮賊與君約日子之才傳修期馬賓王流也從我游軍藏治中別駕所以煩士元者在我無憂

君以母老道遠思歸辭曰昔溫太真東晉之國士也絕裾違親爲論史者所惜吾豈以五品官而置七旬垂白於八千里外乎謝侯南歸貧無以養恒負米湖湘間歲一歸省母旣又客秣陵會稽雲間地較近輒數月一歸省中嘗一遷嘉興再遷蘇州九上春官皆下第遂絕意進取淮南巴樸園副使光誥宿崖觀察光奎重君才延之並爲刊所作詩乙亥十月君在真州聞母喪戴星而奔不納勺飲者彌月以哀毀卒死孝也君性情篤摯好學不倦於經史古文無不讀尤喜觀仙佛怪誕九流稗官之書一發之於詩國子祭酒法式善以君與嘉興王曇常熟孫原湘爲三君作三君詠善書各體皆工雖倉卒點畫不苟能吹簫鼓琴度曲不失分判所作樂府院本脫稿老伶皆可按簡而歌不煩點竄君在勒侯戎幕苗女從

征者曰龍公妹侯欲以歸君君辭曰非所堪也君之爲詩專主才力每作必出新意嘗言自漢魏至近以詩鮮不讀者非盡其才無以立也不作可也作而不傳猶不作也故君所作餅水齋詩不沿襲古法而精力所到他人百思不及非其性情篤摯所見端歟余交君久婁東蕭君掄久客余尤與君善君旋吳必過余與蕭君作數日談故知君較深君燕產也先世久宦無家母久居吳安焉君生卒皆在吳友人謀葬於吳並於武林謀著籍焉從君志也子三昌枚鎮樓祖椿女一陳文述曰乾隆嘉慶之際詩人相望歸愚守宗法隨園言性霸學之者衆未有能盡其才者君獨以奇博剏獲橫絕一世余所識詩人衆矣必以君爲巨擘焉至性過人殉母以死詩人實孝子也可悲也夫

乾隆戊申 恩科舉人揀選知縣舒君行狀

曾祖勲縣學生

皇贈中憲大夫

祖大成康熙壬辰科進士翰林院檢討

皇贈中憲大夫

父翼廩膳生廣西永福縣縣丞

本貫直隸大興縣人年五十一

君諱位字立人鐵雲其自號也初君世父希忠官江南君父永福君偕行寄孥吳門而生君誕之夕母沈太孺人夢一僧手執桂花自峨嵋來覺而生君故小字犀禪十歲能文章世父希忠有家駒之目十四歲隨父之永福任讀書署後鐵雲山因以自號安南八貢侍父出鎮南關迓使者賦銅柱詩相

贈答傳詩於其國中壬寅入都下第居京師發檢討君遺書
數萬卷讀之年二十四舉戊申恩科京兆試是時永福君
一攝縣事再攝河池州以南丹厰事去官家留粵西而獨游
荆湘間逾歲歿於江西之弋陽世父希忠亦先於江西糧儲
道任被吏議原籍田產皆已入官故鄉無一移可居太孺人
固吳人憚於北行君因自粵迎歸并奉永福君柩以南而吳
門舊所市屋已屬他姓乃之湖州烏鎮假沈觀察啟震屋居
之觀察雅重君才以是十年無風雨催租之患旣免喪貧無
以養去客河間太守王朝梧幕中太守擢黔西觀察要君同
行君因道遠爲書請命於太孺人太孺人報之曰吾體甚安
汝當及時以報知已毋戚戚爲內顧憂也君得書始許偕往
會南籠仲苗反大將軍威勤侯勒保檄觀察從征君爲治文

書侯大賞之數召至軍中與計事苗女從征者曰龍么妹欲以歸君君辭曰非所堪也侯以是深器之狎苗平功狀將上達因有所格不果嗣勅侯移督四川謂君曰以君人品學問能從吾遊別駕治中之任自有所以煩士元者在幸勿吾卻君又辭曰老母倚閭久矣古人不以三公之位易一日之養位敢蹈絕裾之失哉遂卽日束裝南歸歸而承顏者逾月無以供菽水仍幕遊湖湘間中丞祖公之望方伯長白通公恩皆器重之歲歸省視其母其間一遷嘉興再遷蘇州旣客雲間會稽金陵地較近輒數月一歸省遠方有以書幣招者輒謝勿往蓋因老母在堂久已無遠行之志矣君生平於學靡不研究而尤工於詩其論詩曰人無根柢學問必不能爲詩若無真性情卽能爲詩亦不工所著瓶水齋詩集實能無愧

此言鉛山蔣太史士銓陽湖趙觀察翼與訂忘年交國子祭
酒法式善以君與嘉興王良士昭文孫原湘爲三君作三君
詠長洲宋觀察思仁爲刻臯橋今兩集詩兩卷行世君是時
名滿天下世皆期君必爲世用君亦銳欲成進士爲祿養計
乃九上春官卒不得遇至甲戌禮闈絕意進取君時年旣五
十而太孺人春秋亦八十有八矣淮南巴君光誥及其弟光
奎慕君名延致之家并爲刊瓶水齋詩集十八卷乙亥十月
君在真州聞太孺人歿戴星而奔水漿不入口者三日擗踊
號泣聞者莫不流涕旣患疾篤醫來視之皆言悲痛過度中
氣受傷非藥餌所能治延至除夕而卒遺命以素服殮距太
孺人之喪蓋僅七十有三日耳君生於乾隆三十年九月四
日得年五十有一娶金氏生丈夫子三昌枚鎮樓祖椿女一

字陸方君之居喪也裴之唁君於苦次見君柴毀骨立心竊憂之因進以五寸不致毀毀不滅性之言君泣頷曰子言誠然某自弱冠失怙母子相依爲命終以家貧負米故不能恒侍膝下聞子力斥某太守背親遠游之非未嘗不怵怵心動今母一旦棄養某方自恨不獲躬親含殮詎敢蹈古人不勝喪之責以重貽泉下戚哉言訖復大慟君卒前數日裴之日徃視君疾君顧語曰某未嘗病特覺五內摧傷耳蓋君至性過人人皆以爲子野之毀而不自知其過哀也君孤昌枚鎮樓辱與裴之爲昆弟交以裴之素受知於君知君者莫裴之若也因屬次其生平言行大畧俾異日爲史乘者有所采擇焉嘉慶二十一年正月日錢唐陳裴之謹狀

[illegible]

舒鐵雲孝廉墓誌銘

太倉蕭掄譔

舒君鐵雲之卒也友人錢唐陳雲伯經紀其喪復謀營窀穸於支硎山下其孤昌枚以事狀乞余爲壙中之文余曷敢辭按狀君姓舒氏名位字立人又字鐵雲直隸順天大興人曾大父諱勳庠諸生祖諱大成康熙壬辰進士翰林院檢討父諱翼廩膳生廣西河池州知州母沈安人先是君世父希忠官江南河池君從遂寄孥吳門而生君君年十四隨父之永福縣任好讀書工爲文詞署後有鐵雲山因以自號舉乾隆戊申京兆試是時河池君已去官家留粵西踰歲沒於弋陽君方在京師念故鄉無屋可居而太安人在南久樂其風土故自粵迎歸而並奉河池君柩以南僦居湖州之烏鎮其後復寓吳門從母意也故君雖燕產而實終身爲吳人君初舉

孝廉時才名藉甚既免喪爲祿養計就試春官銳欲成進士然終不遇也去游四方資修脯以養母嘗客河間太守王朝梧幕中太守擢黔西觀察君從之往會南籠苗反大將軍威勤侯勒保檄觀察從征君爲治文書侯大賞之數召至軍中與計事事平侯移四川欲羅致幕下謂之曰君槃槃大才能從吾遊當於治中別駕間位置士元耳君辭曰老母倚閭久矣古人不以三公之位易一日之養位敢忘諸卽日束裝南歸自是又頻試南宮卒不利母年益高不忍遠出真州巴君昆仲慕其名延致之家間數月一歸省母母歿踴躍哀泣聞者流涕遂成心疾而卒距母之亡七十有三日嘉慶乙亥除夕也在禮五十不致毀又云毀不滅性此蓋設爲中制不欲人之以死傷生而人子創巨痛深則有不暇計其合禮與否

者未可以是非議之也是以春秋書子野之卒曾無貶辭不然則是減性爲罪而在戚有嘉容者反賢也烏乎可哉君博極群書好爲詩尤工歌行體與酣落筆往往如昆陽之戰風雨怒號當者無不披靡玉川月蝕昌黎陸渾山火不能過也余嘗疑立人內行醇備庶幾庸德之君子而詩才奇偉恣肆殊不類其爲人旣而思之君惟性情沈摯故詩筆不苟同人其終成就亦卓然爲獨行傳中人也可謂難已君享年五十有一娶金氏生丈夫子三昌枚鎮樓祖椿女一葬於都

圖 原當君未歿時巴樸園副使宿崖觀察爲刻其餅水齋集十六卷別集二卷而雲伯之治其喪越人單竹軒治中助之置裨觀其友而君之爲人可知已銘曰

其詩可傳其人不朽我銘幽宮用詔厥後

[illegible]

引

餅水齋集十六卷別集二卷自巴樸園副使刊於眞州

閱七十餘年版片寢失吾友鐵嶺宗獻梧郡丞

山博綜

羣籍尤留意北方文獻嘗謂乾嘉之際畿輔作者林立

鐵雲先生天才橫溢陵嶽聳古今與常熟孫子瀟秀水王

仲瞿兩先生相頡頏當時有三君之目今孫王譔箸江

目南家有其書舒集別無刊本當繼巴氏重鋟以廣其

傳爰從丁君松生假得原刻本甫授梓而疾作繇憊之

際舉付

保樞

屬爲卒業

保樞

諾而受之將以傳舒先生

者竝傳歟梧也深懼廢墜負我亡友迺與松生函約同

志釀資助刊嶺南許星臺中丞年丈復力爲提倡距歎

梧之歿十閱月而書成譬造浮圖七級快睹合尖自今

當與天真閣煙霞萬古樓兩集鼎峙不朽旣醺酒以告
猷梧益重我山陽鄰笛之感已光緒歲在丁亥六月任
邛後學邊保樞謹識

光緒順天府志

先賢傳

舒位字立人號鐵雲大興人乾隆五十三年舉人祖大成

康熙壬辰進士官檢討有試墨齋詩集鐵輔詩傳位幼承

家學工詩古文先正事略年十歲卽下筆成章十四隨父翼官

粵西永福令讀書署後鐵雲山房因以自號冷廬雜識安南

入貢隨父迎使者賦銅柱詩相贈答弱冠登賢書陳文述舒鐵雲

傳屢試禮部不第客黔西道王朝梧所會苗匪蠢動威勤

侯勒保檄朝梧從征位爲治文書勒保大加賞異數召至

軍中與計事勒保移督四川邀之同行以母老辭先正事略旣

歸貧無以養乃乞米吳楚間出行攜二大篋一儲書籍一

儲絲竹此外行李蕭然也冷廬雜識當勒保征苗時檄調土

兵貴州土司龍躍病命其妹龍氏帥兵馳抵軍門龍氏年

十八長身白皙結束上馬出入矢石閒所戰必捷秦良玉

不是過也事平後勒保爲龍氏執柯將以歸位位婉辭之

陳文述撰位丰神散朗如魏晉閒人紅豆樹詩話國子祭酒法

式善以位與嘉興王曇常熟孫源湘爲三君詠舒鐵雲傳在真

州聞母喪戴星而奔不納勺飲者彌月以哀毀卒冷廬雜識三

位性情篤摯好學不倦於經史古文無不讀尤喜觀仙佛

怪誕九流稗官之書一發之於詩爲詩專主才力每作必

出新意舒鐵雲傳嘗論人無根柢學問必不能爲詩無真性情

卽能爲詩亦必不工所作合騷掩雅矜奇灑落雖極意馳

騁而無泛駕之虞蓋博涉羣籍性情根柢載之以出非枵

腹從事拘牽格律者比也誕之夕母沈孺人夢一僧執桂

花自峨眉山來覺而生故又小字樺禪云

紅豆樹
館詩話

[illegible]

餅水齋詩集增錄

舒大成字子展宛平人康熙五十一年進士官翰林院檢討有試墨齋詩集

自城子山還宿白家灘贈主人

到山日亭午雞鳴桃花村
杳杳原隰廣藹藹桑麻繁
展眺興方永卽事情彌敦
盤餐古時俗作息平生言
際夜轉清閨明月來南軒
撫時甯不惜勞生焉可論
當須遂夙願與君采芳蓀

山行

杳杳雲外鐘原陸颯已晦
甯知沙際月復與前峯對
墟落有歸人烟蘿聞犬吠

東靈臯先生

伐木廢千載勞者方感歌
叩須良有繫觀善匪在他
大道無隱晦斯文流江河
先民重邁征所戒惟蹉跎
春風迴歲律芳色滋庭柯
喟然慚所欽去日何其多

當時

玉筍嚴催金叵羅當時歡會總如何
燕辭華館無回信葉落橫塘有去波
曉日軒窗閒夢少晚涼庭院別懷多
露桃花下三年客腸斷秋來一曲歌

保樞謹案子展檢討試墨齋詩集其全藁不可得見

國朝詩別裁集選刻古近體詩四章
陶冕薌宗伯据之錄入畿輔詩傳復
据茲集第五卷增錄重過摩訶菴看
杏花七律一首蓋亦未見全集也學
者多盛稱鐵雲先生之才而檢討詩
流傳既尠至無有能舉其名者因埒

刻弁於茲集之前俾讀鐵雲先生詩者知淵源有自云
保樞又識

瓶水齋詩集

校勘姓氏

番禺許應鑠星臺

善化瞿鴻禩子玖

江甯何兆瀛青耜

昆明龔嘉儁幼安

桐城方昌翰宗屏

仁和許增邁孫

仁和譚廷獻仲修

仁和王震元篋圃

仁和王國楨稚夔

仁和陳光第伯弢

錢塘姚近維震齋

錢塘汪曾唯子用

錢塘宗永祐篤庵

錢塘吳慶坻子修

錢塘吳有倫仲平

錢塘徐珂仲玉

會稽徐友蘭培之

錢塘丁丙松生

秀水沈景修蒙叔

大興陳文騏仲英

潞河莊淦仔今

溧陽姚光宇季眉

黎城高廷蘭少琴

武陵趙篤恩澹如

武陵譚恩黻子佩

震澤莊人寶堅白

善化趙煦舜臣

元和孔廣鐘醉棠

常熟鄒文沅芷汀

燕山廉佺仲偃

任邛邊保樞竺潭

[illegible]

餅水齋詩集編目

讀萬卷書未能破之行萬里路僅得過之積三十年存二千
首飛鳥之身候蟲之口見歲若月視後猶今天空海濶山虛
水深嘉慶二十年夏六月鐵雲山人自序

卷一

壬寅癸卯甲辰乙巳丙午一百四十三首

卷二

丁未戊申一百四十二首附錄一首

卷三

己酉庚戌辛亥一百三十一首

卷四

壬子癸丑一百三十首附錄三首

金水齋詩集目錄
卷五

甲寅乙卯丙辰一百四十八首附錄四首

卷六

丁巳一百三十七首

卷七

戊午己未一百六首

卷八

己未庚申一百四首附錄二首

卷九

庚申辛酉一百五十六首附錄一首

卷十

壬戌一百三十八首附錄十七首

卷十一

癸亥一百二十八首附錄五首

卷十二

甲子乙丑丙寅一百五十三首

卷十三

丁卯戊辰己巳一百八十一首附錄六首

卷十四

庚午辛未一百六十一首附錄五首

卷十五

辛未壬申九十一首

卷十六

癸酉甲戌九十首附錄七首

金水齋詩集續集
卷十七續刻

乙亥八十二首附錄二首

附別集二卷詩話一卷

餅水齋詩集卷一

大興舒位立人

元默攝提格

銅柱

日微煩郵吏雲臺失畫工關中遲鄧禹牀下拜梁松豈有三
遺矢曾經一挂弓可憐銅馬式何處鳥呼龍

突兀三千仞摩挲五百年將軍功畧地丞相樹叅天華表疑
歸鶴淫谿感視鳶六州誰鑄錯只有謗書傳

崑崙關作

不到崑崙山直上崑崙關三更銅面具一曲大刀鏤絕壁飛
諸將華鐙耀百蠻我時倘投筆定可勒銘還

叩頭蟲

叩頭蟲無腰而折無手而空跂跂脈脈何所求剝剝啄啄頻
叩頭獨不見斷頭將軍強項令與蟲語冰蟲弗聽

斷腸花

斷腸花碧於血雙心一秣相歡悅一去兩心相決絕妾是海
棠根郎是菖蒲節斷腸花可食斷腸之人不可得

相思子

埋得相思住種出相思樹千秋萬歲相思處烟雲過眼月入
懷琵琶一聲花亂開爲君紅結相思胎

催歸鳥

催歸催歸日未西鴛鴦不獨宿鷓鴣亦羣飛遶西春夢黃鶯
啼碧紗如烟鳥欲棲催歸鳥歸家好歸已遲川太早

柳州柳子厚祠

密雨驚風外何人識柳州竄身來絕域失足誤清流鳥下山
城夕花香水殿秋潮陽祠屋近無那故人愁

東泉旅夜

逆旅東泉道深宵景象殊澗猿流月響野虎負風趨仰屋枕
椰暗循牆薜荔籠青鐙搖一豆詩興強支吾

鮓虎行

鬼門關前人似海猛虎捉人如捉鬼人鮓甕中虎雜居居民
鮓虎如鮓魚爲言前宵偃鬼來悲風蕭蕭林木摧山根舊有
伏機弩弩末不能穿虎股不如左手提鐵叉右手打銅鼓虎
聞鼓聲見叉影竿尾箕睛怒而舞是時虎意已無人人亦不
復目有虎劃然一嘯當一叉一叉虎口開血花抽叉捧虎四
山響月破風腥一虎仰雙杖椎鼓雨點塵沉沉九地追虎魂

天明曳虎歸茆屋不寢其皮食其肉生吞活剝呼巨觥白酒
黃梁一齊熟我聞色變矚欲飛是食人多毋乃肥彼云食虎
可避瘴未下鹽豉敢相餉搖頭謹謝阿羅漢願君努力加餐
飯欣然就食甘如飴風毛雨血忘朝饑吁嗟乎周處南山除
一害李廣北平官不拜我如雞肋感瞽公爾自翫肩壯樊噲
歌成曠野良足豪嚼過屠門亦稱快慎勿消息傳入城縣官
來收虎皮稅官來收稅尙猶可吏食爾虎如食菜爾有虎皮
何處賣

綠珠井

古井波瀾少曾憐照影時身亡顏色累腸轉轆轤知故里山
雙角高樓笛一枝景陽宮在否羞浣石欄脂

桂林鷓鴣詞

相思嶺上石屏顏
啼鳥聲聲在樹間
苦勸行人行不得
行人已上萬重山

秋老西風入桂林
雨絲細細霧沉沉
蒼梧山近黃陵廟
啼殺湘花一片陰

斜陽紅樹曾相見
暮雨青林何處棲
只有鴛鴦不作客
一雙飛去浪如梯

遊七星山棲霞洞

四山轉如圓一洞
鑿其空跳出山外
山采入洞中洞日
月所不到操炬以
動衆照見諸變相
鬼神恣搏弄黑伏
石萬尖青瀉天半
縫蛇行曲竇細狐
聽冷泉滃迤邐三
里餘人語聚一甕
徑絕通風雲出險
如出夢但覺精魂
搖不惜腰腳痛身
輕霞可餐胸羅星
可種來聞清猿嘯
歸與寒鴉共老樹
挂斜陽

前谿一僧送

陡河

有山無水處陡河作其間三十有六陡七十有二灣灣灣各
陡陡不離馬頭山山似攔水出水竟尋山還縈回青羅帶宛
轉碧玉環築席聚涓滴排石喧孱顏扁舟逐波去櫓唱聲聞
關相傳鑿山骨轉粟征南蠻至今太平時尙濟行李艱乃知
古有事其利久未刪不然桂海涸踏破層烟鬟

永州

一水如衣帶風吹入永州朝陽巖上日遙見瀟湘樓巷墻草
書好谿山小記幽榜人間前路未解意勾留

浯谿觀元次山三吾詩刻石

占得谿堂勝蕭然獨往時可憐循吏傳猶是盛唐詩飲酒都

成例磨厓亦有碑先生能造字比似買山奇

衡山道中

歲晚蕭條倚短篷相思迢遞冷芙蓉山從九面帆邊轉水到
三閭廟下濃宰相徵時徵故事夫人仙去祕靈蹤玉璫緘札
看征鴈方便飛回第幾峯

昭陽單閼

岳陽樓

人間何處無城樓惟有此樓傳岳州二月八月湖裏水南風
北風天際舟千年楚客誰憂樂兩首唐詩自倡酬卻上君山
夢吹笛數聲飛作洞庭秋

江行雜詩

大地有時坼長天無盡流春風吹不斷渺此一篇舟日月摩

雙鏡乾坤禁百洲阿誰能賦者殘夢贈青鏤

一夜天花墜蕭條散雪歌長檣眠鐵鹿涇浪踏銀鼉龍水翻
干偈漁鉞畫一蓑輪他驢子背詩思鬱嵯峨

春色望長沙江聲何處家相邀玉鸚鵡一唱銅琵琶還聚山
如米平開浪作花英雄兒女淚懷古蕩無涯

好景三春好長江萬里長連雲暗巴蜀計日下荆襄風急豚
魚拜天空野馬翔身非衛叔寶對此亦茫茫

初發樊城

車輪轉處似羊腸初試馱鈴道里長新婦可憐三日閉陳人
同此百年忙雞鳴膈膊開茆店龍卧蕭條賸土岡畧記短長
亭畔路襄陽北去是南陽

漸看青草四邊生稍喜紅泥一軌平人面沾塵如敗鼓客心

薄暮抵懸旌繩牀投宿鐙搖夢蔥肆加餐餅噉名二十四番
彈指過鳳城楊柳萬條橫

邯鄲道上作

細雨濛濛掃薄埃邯鄲道上杏花開春愁宛轉隨車轍古意
蒼茫付酒杯未熟黃梁唐小說已埋青草趙叢臺不嫌茆店
知音少曲項琵琶夜抱來

題柳

一絲楊柳一梭鶯費許天工織得成已是春愁無片段峭風
猶作剪刀聲

翠幔高樓定幾家封侯夫婿隔龍沙飛揚春夢三千里直到
天涯捉柳花

太學石鼓歌用韓石鼓歌韻

周秦以來數法物燕趙之客能悲歌橋門左右庠上下石鼓
石鼓夫如何惟嘉車攻采吉日遂興禮樂消干戈獵碣有十
母乃是如碑無字鏡不磨三百五篇詩彷彿一十八體書爬
羅比諸盤鼎功則偉出自杵臼形猶我吉甫作頌蒐岐下召
公矢音媚卷阿蒼姬忽聚金石訟黃犬卻遣神鬼訶儒生好
古恨不見既見又復疑其訛包瓊裹席汗牛馬畫腹箝口訝
斗蚪桐魚大叩天地響乃配辟雍逢逢鼉尋原不同水濟水
考異何殊柯伐柯已披雲霧看破鏡沉閱人代驚飛梭朱門
四扇開詖蕩碧落三日行委蛇颯颯大風紀太史娟娟缺月
愁姮娥憶周東遷宋南渡此鼓來往經滹沱贊宮三徙逮皇
慶艮嶽一劫悲宣和天心人事豈異任武功文德應同科石
補五色良足貴金填三品奚爲多幸陪俎豆傍金馬不隨荆

棘埋銅馳昌黎昔願留太學諸生習禮時
相過八代文衰懷而慨三都紙貴切以磋
鳳翔從政始寓目又後百年嗟逝波飛鳳
當年自鬱律續貂後士殊偏頗後之視今
今視昔安復屑屑論其他誰辨琅邪氣辟
易欲諄岫嶠心嬾嬰粵若稽古重太息而
後乃今三摩挲興亡不聞史筆載真偽却
探詩囊哦或則言馬或言鹿或願爲鸛或
爲鷺石鼓石鼓夫如何非鼓非石愁無那
古法未遠自忠厚碩果不食非輶軻經天
皇照日月行地浩浩流江河石不能言鼓
乃壽千秋萬歲毋蹉跎

空谷

空谷佳人絕世姿鴟媒一去苦相思
天寒修竹娟娟靜翠袖蒼茫獨立時

記得紅鐙待曉初春痕深淺十眉圖問渠小麝丁香印銷盡
宮螺五斗無

東鄰卻扇夜催妝豔絕金釵十二行等是離鸞故鄉恨輸他
情願嫁王昌

采采薜蘿山上山天涯春夢大刀鏤不知西海三青鳥肯爲
傳言玉女還

三年風月夢行雲腸斷金泥蛺蝶裙一串明珠留不得雙題
紅淚寄還君

秦箏促柱唱易易大道朱樓酒易沽別有空房三婦豔不曾
生小學當壚

流黃明月漾秋深錦字雲機一片心織到天衣無縫處些些
鍼線本難尋

鎮日青簾一桁垂，鴛鴦繡出下階遲。
不須金線年年壓，自有春蠶五色絲。

雨後過法源寺

寥寥梵王宮，雨霽劇清美。
潭影照素心，鐘聲落幽耳。
雙屐不逢人，微鴉隔林起。

昭君詩

漢元帝時陳湯斬郅支單于，傳首京師，呼韓邪單于聞之，且喜且懼，入朝願壻。漢氏遂以後宮良家子王嬙配焉。
漢書作牆，通鑑作牆。匪寇昏媾，與唐回紇有異。自石季

倫王明君辭已多，謬詠後之作者第弗深辨。惟元帝按圖召幸，致譏險謁，而嬙又自向掖庭，令請行不已。衍乎譬如李平馳間道而始識真卿毛遂喻囊，雖而

自媒趙勝上不好瑟下不愛鼎士女之耽嗜可慨矣
永巷年年怨綺羅長門夜夜定風波可知千載琵琶語絕勝
三秋團扇歌依舊錦車馳玉壘分明鈿合隔銀河蛾眉膏用
黃金贖妾被黃金誤已多

天漢當年百戰勛安危誰料託紅裙紫臺夢冷南宮漏青冢
魂招北塞雲尙有牧羊蘇屬國可憐射虎李將軍由來一片
關山月拍遍胡笳不忍聞

省識春風一面無真真難向夜深呼卷中人在崔娘老馬上
妝成蔡女孤此去定騎紅尾鳳再來豈有白頭烏當時竟殺
毛延壽未畫明妃出塞圖

雁門關外馬牛風遠嫁烏孫事畧同但使古公能好色不妨
魏絳論和戎掖庭請去恩非薄山壑猶存句最工回首平城

三十萬是誰奇計出無窮

宋文丞相論語題文歌

丞相之文傳何時作者真僞未可知其間不復加考辨信以傳信疑傳疑當年第一邁陽九考官擊節稱其奇詔書再起時事改撫几散盡千金貲上郡豪傑勤帝室中年絲竹驅歌姬一成一旅雖可用三戰三北誰能支中間不合大如礪天荒地老兵馬司狂人兵起太倉卒從容就義請死之浩蕩正氣歌感歎臨終詩與汝偕隱有遺恨事君致身無媿辭卽論文章已奇絕況有忠孝相扶持大都承旨技可惜南朝降表辭尤卑除非生祭與郤聘不爾慟哭登西臺乃知大節不可奪日星河嶽常昭垂張睢陽詩諸葛表豈惟重其文辭爲

雪後曉起有寄

昨夜西峯雪蕭騷掩畫屏便應揮玉麈不惜倒銀瓶鴉散樹
微白雞鳴山欲青相思落梅曲愁向笛中聽

闕逢執徐

西山

城外青山屋後看朝來爽氣破春寒笙鐘萬谷酣風合臺殿
層霄霽雪殘空際軟紅飛不到吟邊積翠望無端未容亂踏
浮雲去西北高樓正倚欄

春晚宴集聞歌

歲歲春歸等逝波金樽檀板奈情何心驚李賀殘絲曲腸斷
桓伊清夜歌隔嶺音書飛雁少閉門風雨落花多南鄰亦是
消愁地乘興還能許再過

出南西門憩廣恩寺遂至豐臺卽事

出郭蒼茫塵事稀春風一徑叩禪扉
橋橫流水客纔到門掩落花僧未歸
初地鐘魚閒說法故園鷗鷺靜忘機
幽尋不厭頻延伫杳杳青林漏晚暉

依然楊柳倚風栽嫩葉長條拂面來
送我馬蹄過蕭寺隨他蝶影到豐臺
養花天氣紅簾卷傍水人家綠鏡開
揅與青錢買春去一枝斜插帽簷回

殿春曲

紅雨霏霏拂畫簷濕鶯啼處夢痕黏
曉來花氣濃於酒不抱文珠便卷簾

闌珊春事到豐臺婪尾深深倒玉杯
日暮豐宜門外路車如流水看花回

門前一片賣花聲紫韻紅腔別有情
盡日自隨蜂與蝶不知

春思爲誰生

將開未開露漸稀
欲語不語春依依
粉奴舞袖一迴雪
不羨揚州金帶圍

翦收絕豔有金刀
雲髻戔戔不厭高
一朶午痕紅膩處
只疑花把鬢鴉燒

長椿寺九蓮菩薩畫像

妙蓮華下湧金輪
玉匣珠襦有化身
尊號已加皇太后
圓姿仍現國夫人
閣中取傳徵文史
宮畔修齋託鬼神
彈指華嚴樓閣裏
膠山絹海一微塵

小游仙詩

清淺蓬萊阿母家
春流一鏡漲桃花
無因風馬雲車路
歸向銀河借客查

雲旗十丈畫初翻六甲靈飛拜上元
閒殺閻風附書霍盡教
玉女爲傳言

曾入眞靈位業圖
謫居猶得守天厨如何一抹流霞影醉倒
河東項曼都

碧落抽簪遠叩扉
粲然玉齒啟靈妃含情欲說他生事正好
金籠放雪衣

石壇花雨傍南城
狡獪丹砂太有情一樣新人雙手爪雪邊
還要耿先生

七寶清虛證上仙
秋風一樹倚嬋娟費他斧鑿痕如許纔到
彎彎月子圓

別館承霄卻贅秦
三聲橫玉破紅塵分明烟霧乘鸞去未信
蕭郎是路人

紫泥小海別經時青綺疎窗忽見之如此紅泉不能渡十年
春夢采華芝

擬沈雲卿鐵馬金閨之作

楊柳西關笛胭脂北苑妝去時人易老歸日路尤長紅淚新
嬌別黃沙古戰場真成獨不見猶作永相望

五雜組

五雜組織流黃往復還海燕翔不得已守空房

五雜組妓紅拂往復還虬髯客不得已扶餘國

五雜組霓裳舞往復還漁陽鼓不得已馬嵬土

五雜組文選熟往復還應科目不得已學干祿

五雜組蓬萊島往復還鹿盧躋不得已食酸棗

夜坐卽事用太白秋夕旅懷韻寄友

涼颼觸青蘋萬里秋雲飛尺素不可託雁鴻將安歸開簾滅
燭影流螢坐我衣思蛩抱孤響薄月邀斜輝豈無夙心儔別
遠良會稀終須畢始願黃塵深宵揮

讀長恨傳三首用李義山碧城詩韻

誰將辱井比長干無復飛橋奏廣寒踏臂悔教來赤鳳返魂
何處覓青鸞空餘宮女偷閒說忍使天孫帶笑看淒絕江南
花落後拋殘腰鼓共鈴盤

玉體匆匆見小憐六軍無暇請遊田紫茵裏後難回首紅藥
開時記竝肩客寄雙釵雲滿鬢嫗留一韞月初弦無因更問
樓東笛鐙暗長門背雨眠

地久天長有絕期分明外傳淚雙垂心驚忽更聽鸚鵡齒痛
誰能咲荔枝生女生男空復感爲雲爲雨豈堪思年年宮殿

江頭閉付與新蒲細柳知

待闕

待闕賀鶯社有無傳言鸚鵡事模糊奪裘未必羸雙陸側帽
何須效獨孤枉向砒砒求美玉竟將蕙苴抵明珠只應桂海
虞衡志歸去書成范石湖

旃蒙大荒落

盆梅一本無生態久矣今春始花悵然有作

梅花忽已開芳此虛堂夕幽人臥花冷門巷無行跡起眺銀
蟾蜍溶溶漾簾額徘徊泛霞觴清狂動吟魄頗憶山寺僧手
種此標格殷勤寄冷枝谿頭雪初積盛之綠花蕤圍以白綺
石香泥護其根淺水承其澤始言歲寒姿久要竝松柏胡然
歎遲暮飛翼暗狼藉萋萋綠蒲晚落落黃楊厄榮衰殊不常

棄捐良可惜有如古詩人蕭條在遷謫又如古美人淒涼怨
離別東風蕩園林夢入藐姑射鼻觀浮暗香故枝訝婉孌寒
芳漸宜賞疎蕊未堪摘撫茲循環理悄焉感疇昔花開見有
人花謝送無客等待宦歸來相將話清白

題畫

曾從山上采薜蘿流水華年憶故夫未信無情天不老試垂
霜鬢看麻姑

銑谷珠還不墮香笛聲依舊按伊涼何人五字紅樓底偷寫
徐妃半面妝

感遇詩

咄咄復咄咄百代如過客壯夫輕黃金君子重白璧白璧苟
有瑕不如瓦與石黃金能繞指不如寸寸磔所貴霜雪姿蒼

然見松柏白鷺非純真羽毛空自潔

卞和三獻玉蘇季十上書所持益不貴汲汲非其時厚顏泣
金盡則足歎路歧書玉旣已往秦楚安可知所以南陽畊潛
伏神龍姿悠悠梁甫吟三顧乃出師

終南有捷徑猿崔怨未休均堂覆杯水蛟龍弗來遊況此致
身早乃啟失足羞冰山倏朝旭得喪兩不酬昔日東閣客今
日南冠囚不見八司馬直至蠻荒州

象齒旣自焚豬肝亦多累始爲蒼蠅咲旋下黃犬淚人生天
地間翺若騁雲轡水流不重波花好無再墜慎始名可成知
足願易遂斯言書諸紳席以勗同類

春雪歌

去年雪深不滿尺十里五里無宿麥今年風熱浮雲積三朝

三暮猶徘徊天遣飛瓊散花手瀛洲玉塵十萬斗玉田珠樹
春無聲益以靈霖賜南畝酌我酒爲君歌開門見雪喜則那
豐年之占洵有象傲裘不覺春寒多春寒沉沉遲漏箭焚硯
猶能誇白戰但覺詩情出險奇誰知天意矜愚賤我聞齊梁
之間穀食稀連年苦旱草不肥雨珠不得以爲粟兩玉不得
以爲衣安得雪花片片大如席能令四方萬國無寒飢春雪
歌歌玉戲願祝年年老農利菽麥黍稷惟馨香薦諸俎豆事
上帝

仇英桃花源圖

桃源洞武陵谿武陵谿口桃花隄扁舟捕魚者誰子忽逢桃
花紅欲迷再來不記桃源洞漁人竟作桃花夢桃花疑夢人
疑仙惟有武陵流水聲濺濺君不見阿房宮中三月火函關

一丸不能鎖火光迸入武陵谿烘出桃花紅萬朶秦人避火
聞花香漸入佳境非故鄉外間蛇鹿內雞犬一十七史龍元
黃當年劉阮天台去人面桃花渺何處太守何須更問津仙
人大抵無情人無情有情轉愁疾但見山深而林密直教招
隱作清談且與鑿空傳綵筆

題赤雅

百越茫茫感舊遊誰傳風土記銀鉤拋殘海上梅花瘴搖落
山中桂樹秋天女雙鬟留客住鬼門一髮使人愁韞雲驟雪
都無價愛妾還能換馬不

屈宋衙官恨有餘爲誰甘露下庭除可憐當日三條燭不要
先生五體書授筆從軍天外夢抱琴招隱山中虛浪花歌後
春烟老身手猶能化蠹魚

紅梅花詩

細雪霏霏胷院門
醉紅深淺早黃昏
經時翠羽飛無路
幾處朱樓夢有痕
春水欲迷桃葉渡
酒人空憶杏花邨
東風芳信年年負
更取坡公句子溫

東坡詩年來
芳信負紅梅

柔兆敦牂

南西門楊柳枝詞

春城風雨路旁枝
郎馬青驄去幾時
放下珠簾三十里
一時楊柳盡成絲

家住章臺街上樓
三年消息板橋頭
東風相送閒桃杏
青眼看人不自由

塞北書成白雁稀
遼西夢斷黃鶯啼
不如吹作花如雪
得向天涯處處飛

九十春光尺五天
短簫聲唱柳屯田
今宵酒醒不歸去
殘月曉風何處眠

城南

城南尺五接街西
御史臺臨宰相隄
賜吻由來都好望
禿鶯從此不須啼
卽看紅日長安近
那傍連雲大夏棲
卻有當關晨報客
誤人消息自天題

午日見人家戶側有縛艾作人形者題曰鍾進士戲爲之詠

南山白石老鬼家
一劒綠繡菖蒲花
三年之艾五日福
風聲崔嵬咸驅邪
爲誰蒿目但相視
猶有蓬心遽集此
褊褊觸熱到人家
小草出山成進士

古鏡詞

冷月蒼蒼暈一規未知肝膽沉鬚眉如何乾德年間物惆悵
銅官沒字碑

倚鳳盤龍舊夢孤一言擬問鏡當初水精簾下梳頭影曾照
佳人絕代無

菩提樹下一塵生佳識芙蓉夢未成正是郎君羞妾面幸虧
相對不分明

陽臺謠

芙蓉十二高唐女入夢微聞楚臣語鈿牀繡枕夜相邀雲者
行行欲爲雨別有深宮鎖細腰加餐不敢暮還朝朝朝暮暮
長如此抱月飄烟爲君死

綠陰

雨定風和日漸遲濃陰一院與支持春歸萬紫千紅外人憶

迴黃轉綠期竹色上簾皺作畫茶烟吹髻鬟成絲笙寒水皺
誰料理十四年前杜牧之

夕陽

鉤簾人倚亞闌干滿眼斜陽獨自看愛惜無過陰一寸消磨
何止日三竿漁蓑歸去波猶影鴉陣塗來墨亦殘莫近黃昏
便惆悵夜深還有水精盤

南國

南國有蛾眉窈窕善無妬集裳芙蓉芳紉佩秋蘭素修名恐
不立內美紛自顧誓將託君子結根深且固悠悠楚江濱嫋
嫋西風渡泛泛木蘭舟遲遲爲君故黃昏以爲期中道忽改
路木葉下洞庭美人怨遲暮

書劒南詩集後

魏闕江湖夢未忘
白頭射虎意飛揚
他年家祭淒涼甚
又見中原作戰場

將軍西第頌誰傳
丞相南園記可憐
爭似江東楊轉運
一官一集自編年

小樓深巷賣花聲
七字春愁隔夜生
較可尚書詞絕妙
一晴一雨唱紅情

誰遣鴛鴦化杜鵑
傷心姑惡五禽言
重來欲唱釵頭鳳
夢雨瀟瀟沈氏園

秋日詠物詩

試問河中鯉書來第幾行
愁余何眇眇對此亦茫茫
樓閣仍雙影蒹葭又一方
乘查消息去清淺夜相望

秋水

蒼茫今古別黃落
短長條金線拋
三月珠簾卷六朝
笛聲斷

腸曲人影銷魂橋倘憶張思曼風情爾許消

秋柳

淒清聽不得又是擣衣時陌上黃鸝曲閨中白紵詞玉弓秋
皎皎銀箭夜遲遲寄遠那能到惟君夢裏知

秋磴

寂寂翠屏掩亭亭紅燄開鏡心斜映處釵股緩挑來雨急花
應落宵深草剩煤情知十年事孤負爲疑猜

秋鐙

廣遊仙詩

弱水三千里蓬山一萬重雲旗招未下霞輦去相逢塵待元
鸞拂書當青雀封瑤臺高宴散惟聽曉來鐘

王母

靈藥天潢貴誠諧野史聞機絲虛夜月河漢卷秋雲此地查
難借他生路又分祇應一片石化作望夫君

天孫

美人抱明鏡七寶夜修成臣里青琳宇儂家白玉京散花過

小劫竊藥話長生乍聽霓裳序天風第一聲

月姊

嫋嫋西風下青鐙誦九歌蒼梧人去後綠竹至今多湘水晴
開鏡君山遠畫螺妝成愁眇眇流恨滿雲和

帝子

初月

初月纔如許微茫共此心照人當夜淺送客到秋深河漢流
虛響關山變遠陰彎彎唱歌去難向九州尋

未必嬋娟子眞成懊惱歌明弓能幾合破鏡欲如何奔豈通
銀漢修應借玉柯十年鴻鷺易好好託蘇摩

珠樹層層暗瓊池的的遙一鉤橫碧落三日憶紅翹清夜拋
團扇美人吹洞簫應知舞鸞匣殘黛一時消

節物他鄉換音塵隔歲遲風懷無左右月魄有盈虧樸渥春
難好方諸取未知蕭條看不得留待一輪時

佛

美人只合住西方往往逃禪作道場
百日清齋飢欲死三生結習老難忘
浴當苦海身誰度繡入情絲手亦香
乍出文殊女子定花飛釧動拜空王

仙

枕函催漏小游仙瑤想瓊思覓洞天
王母西池環一水麻姑東海見三田
求憑方士真癡絕謫作詩人亦可憐
欲寫相思收鳳紙海山風峭打虛船

鬼

成佛生天定幾時聞聲對影又何之
漫勞拍手從旁咲最可寒心到夜遲
聽去妄言人下酒破來險語我題詩
不知墮向泥犁者可有驚才絕艷詞

神

洛浦招魂枕可留
漢皋錄別佩曾投
他生雲雨荒臺夢
昨夜星辰別殿秋
暗裏金錢偷自小
愁來玉笈祕難搜
義山本是傷心客
一賦明神恨未休

三十六體

青粉牆邊翠漆扉
歲華深下吠厖稀
殘星不動池波淺
秋露無聲木葉肥
酒醒愛飲三角髻
燈涼遙射五銖衣
不愁畫鼓譙門急
繡被焚香緩緩歸

和人詠物四首

窈地重門作畫暝
瀟湘十尺倚風聽
迎來桃葉難呼渡
撲去楊花欲化萍
銀蒜不曾妨宿燕
玉叉何意濕流螢
玲瓏一曲無多路
要託微波叩洛靈

簾波

促席笙歌宴未回
燭奴遙夜替人催
消除別恨三杯酒
觸撥

閒情一寸灰望裏青烟猶弄影去時紅淚已成堆翻憐背解
明璫夕曾費金釵細翦來

燭淚

傾銀注玉酒鱗紅妙幻青蓮舌本通荷鍤難容干日醉棹船
已覺百分空閨人翦向鐙前卜詞客開憐筆底工忽憶四明
狂賀監眼花落井太匆匆

酒花

私書歸夢渺天涯別院琴絲苦憶家不分夕熏收睡鳴翻疑
秋陣數飛鴉鄂君被裏眠應早荀令鑪邊篆欲斜乞與情人
題恨字心香痕淺印桃花

香字

雪夜雜詩

秋老關山唱采薇刀鐙無恙遠人歸舊時楊柳芳菲盡一朶
瑤花繡鐵衣

絕塞丁零使節摧誰傳鴻雁上林回年年大嚼天山雪不記

銅盤露一杯

相思合在洛陽邨
烟火蕭條雪打門
容可橫陳三日臥
不知人世有奇溫

谿山雪月兩佳哉
柔觴蒼茫近夜來
興盡還家無限好
不須親見主人回

偷將雀筆等閒披
雙屐行吟冷最宜
似此神仙應不少
相望祇隔一層籬

天女初聞一咲拈
楊花晴撲謝家簾
何因滴粉搓酥手
解唱華奴析析鹽

對影聞聲走蠹魚
清寒相映一帷虛
如何天祿青藜杖
只助劉郎校祕書

最憶襄陽孟浩然
夜窗松月未成眠
似渠恐凍禁寒去
不爲

梅花亦可傳

半夜開關萬馬塵
蔡州門外陣雲高
歸來風大花如席
照見將軍錦戰袍

破帽蒙頭策蹇行
霸橋流水悄無聲
人間此境應愁絕
纔著詩人便有情

掃來鸞尾試茶烟
難得佳人手自煎
一樣銷金春帳底
不曾消渴但酣眠

園林清絕傍孤山
招隱詩成晝掩關
消受寒威應未了
花纔半樹窠初還

偶思白戰聚星堂
此亦平生古戰場
誰識邊兵四十萬
園林鐘鼓句尤強

鼠噉枯藤險韻填
西風吹轉釣魚船
忽聞米桶有人語
強似

會稽朱百年

讀三李二杜集竟歲暮祭之各題一首

萬里蕭條萬古愁，狂歌爛醉與勾留。
時來自奏清平調，才盡空爲汗漫遊。
緩頰遂能逢郭令，揚眉何用識荊州。
星精月魄關來去，如此神仙謫未休。

太白

一賦高軒自有情，驚才絕艷少年行。
傾囊別撰元和體，協律兼工樂府聲。
天上宮樓徵著作，人間場屋避嫌名。
幽蘭啼露香蘭咲，長爪通眉肯再生。

長吉

飄零蹤跡別離天，腸斷樊南甲乙編。
作客悲歡聊寄託，依人恩怨忽牽連。
官卑不挂中朝籍，詩好難禁後世傳。
他日西崑酬倡集，祇教優孟誚當筵。

義山

千秋一部盛唐詩，飯顆山頭戴笠時。
八代起衰風雅變，百年

多病別離遲但從房相論交者豈有嚴公欲殺之西蜀烽烟
南嶽水果然得失寸心知

子美

司勛晚出具風裁傷別傷春泥酒杯作賦但能供蝨誦占詩
忽訝夢駒來感恩事久私成黨薄倖名羸豔費才惆悵露桃
花一樹爲誰搖落爲誰開

牧之

餅水齋詩集卷一終